

# KIKO BIDA TA ?

## DEN E LÈS AKI LO BO STUDIA

- **Dikon Bo a Nase ?**
- **Kon Bo ta Manera Dios?**
- **Kon Bo No ta Manera Dios?**
- **Ki Tipo Di Persona Bo Ke ta?**
- **Kon Bo por Sa Ku Bo ta un Yu di Dios?**

## PROME PARTI DIKON BO A NASE?

### Loke Bo Mester Sa

Kiko lo bo pensa di un hende ku a purba di uza un sombré di kabana pa un wea di kushiná òf un bòter di glas pa un martín? Kiko lo bo pensa di un hende ku a maluzá hinter tur su bida promé ku ela haña sa di su propósito?

Nos lo ta manera e sombré riba kandela òf e bòter ku a uza pa martin, te ora ku nos pone nos bida pa uz'e pa loke ela wòrdú trahá. Nos ta bai den bida sin haña satisfakshon.

Dios tin un propósito i un plan pa bo bida. E tin un trabou pa bo hasi na mundu i a prepará un kas presioso pa bo den shelu. Bo a nase pa ta útil den e plan di Dios.

### Bo a Nase Pa ta Yu Di Dios

Bo a siña ku bo a wòrdú kreá pa e plaser di Dios, pa ta Su yu, disfrutá di Su amor i pa stimÉ bek.

Kualke otro kos ku bo hasi, si bo no tin e aliansa aki ku Dios, bo a pèrdè e propósito prinsipal di bida.

**Salmo 16:11Lo Bo mustrami e berea di bida; den Bo presensia tin plenitut di goso; na Bo man drechi tin delisia pa semper.**

### Bo a Nase pa Krese den e Semehansa di Dios

Pa bo, un yu di Dios, bida na mundu ta manera un skol pa prepará bo pa eternidat. Bo eksperenshanan ta lèsnan pa ekipá bo pa e partinan ku lo bo tin den Reino di Dios. E problema i difikultatnan ku bo ta eksperenshá awor ta diseñá pa siña bo pasensi, fe i obedensha. Nan ta yudabo pa madurá spiritualmente pa asina bo ta mas manera bo Tata celestial. Laga Dios hasi bo e hende dependiente ku E por uza awor i den futuro.

**2 Timoteo 2:12. Si nos pèrseverá, nos lo reina tambe kun'E.**

### Bo A Nase Pa Traha ku Dios

Bo a nase un sierto dia, un sierto kaminda i un sierto hende , pa asina bo por ta un bendishon pa bo famia, bo komunidat, bo pais i pa mundu. Dios ke pa bo ta su partner i traha huntu kun'E. E lo yudabo trese otronan na Kristu Hesus i E lo yudabo tin un mihó bida den dj'E.

**Efesionan 2:10. Pasobra nos ta e obra di Su man, kreá den Kristu Hesus pa bon obranan, kualnan Dios a prepará di antemano pa nos kana den nan.**

### Pa Bo Hasi

- Dios a duna mi bida pa asina mi por ta; Su ..... , krese den Su ..... , i ..... ku n'E komo Su partner.

#### Puntra bo mes:

- Mi bida ta agradá Dios di bérdat?
- Mi ta azeptá sufrimentu i difikultat pa desaroyá pasensi i oportunidat?
- Mi ta hasi loke mi por pa yuda otronan?
- Mi ta biba manera ku morto ta e e final di tur kos, òf mi ta uza mi bida como preparashon pa eternidat?
- Mi ta disfrutá di komunikashon ku Dios?
- Mi a kuminsá sigui e plan di Dios den mi kas i komunidat?

## DI 2 PARTI

### KON BO TA MESKOS KU DIOS ?

#### Dios a Dunabo un Spiritu Trahá na Su Semehansa

Dios a traha e kurpa di Adam for di tera, i dun'e un naturalesa terenal meskos otro kriaturalan den mundu. Abo a heredá e naturalesa terenal ei. E bida interno di Adam, su spiritu, a bin di e rosea di Dios. E spiritu di Adam tabata manera Dios. Bo spiritu, tambe, den hopi manera ta meskos ku Dios.

#### Memorisá Esaki

**Genesis 1:26; 2:7. E ora ei Dios a bisa: Laga Nos traha hende segun Nos imágén, konforme Nos semehansa; .....E ora ei Señor Dios a forma hende di e stòf di tera i a supla e rosea di bida den su nanishi;i hende a bira un ser bibu.**

#### E imágén di Dios den Bo ta wòrdú demonstrá na Diferente Manera

E spiritu speshal aki ta hasi bo diferente for di animalnan. Nos ta yam'e imagen di Dios den ser humano.

#### *Bo por mira e imágén di Dios den:*

- Bo naturalesa moral: nifikashon di bon i malu.
- Bo naturalesa estética : amor pa bunitesa
- Bo naturalesa intelektual: deseo pa sa e bérdat, abilidat pa rasoná, poder di papia i komuniká.
- Bo naturalesa spiritual : deseo pa adorá i abilidat pa tin un aliansa ku Dios.
- Bo naturalesa kreativo: deseo pa mehorá loke ta rondó di bo. Hende ta traha edifisionan haltu, koba riunan, hasi elektrisidat uzabel , i inventá mashin pa traha pa nan.
- E ta krea bunitesa den muzik, arte, arkitektura, poesia, kansion, moveshon i obra di su man.

Esakinan ta bin di naturalesa di Dios i ta hasibo hopi diferente for di animalnan. Nan ta mustra ku bo a nase pa ta yu di Dios i ku E tin un propósito speshal pa bo bida.

#### Pa Bo Hasi

- E spiritu ku Dios a pone den hende ta un refleho di Su..... i ta hasi nos diferente di .....
- Nos ta mira markanan di Dios den hende den su : amor pa bunitesa òf naturalesa es.....; abilidat pa rasoná, òf naturalesa int.....; invenshon, òf naturalesa kr.....; sentido di bon òf malu òf naturalesa mo..... ; buska Dios, òf naturalesa sp..... .

*Bo por mira kon e abilidatnan aki ta hasi bo hopi diferente for di e sobra kreashon di Dios. Pensa riba algu ku bo a hasi ku ta un ehèmpel di kada abilidat ku Dios a duna. Bo tin hopi ideanan i poder ku ningun otro kriatura tin. Un makaku no por skirbi un buki; un leon no por manehá un jet. Gradisí Dios pa kada parti di bo naturalesa ku ta laga bo ta manera E.*

## DI 3 PARTI

### KON BO NO TA MANERA DIOS?

#### Bo tin un Kurpa Físiko



Dios ta un Spiritu infinito, eterno, todopoderoso. E no ta limitá na tempu òf espasio. E no ta muri nunka. Bo spiritu ta biba den un kurpa ku ta limitá na forsa, ku por ta solamente un kaminda kada bia, i ku lo muri un dia. Apesar di eseí, e kurpa ta un regalo presioso di Dios pa bo. Pa motibu ku bo tin un kurpa, bo por traha pa Dios de tal manera ku lo tabata imposibel si bo tabata djis un spiritu. Bo mester kuida bo kurpa bon pasobra ta un kas pa bo spiritu i un tèmpel pa Dios uza.

**1 Korintionan 6:19, 20. Of boso no sa ku boso kurpa ta e tèmpel di Spiritu Santu, Kende ta den boso.....? P'esei glorifiká Dios den boso kurpa.**

Tin hende ta kulpa nan kurpa pa e kosnan malu ku nan ta hasi. Tin hende ta kastigá nan kurpa pa trata na mustra ku nan ta hasi bon. Bo kurpa no ta ni bon ni malu. E ta manera un hèrmènt ku bo ta uza. Abo ta disidí kiko bo ta hasi ku bo kurpa. Bo por uza bo kurpa pa sea bon òf malu, pa Satanas òf pa Dios. Dios ta uza Su Spiritu pa bon so.

**Romanonan 12:1.....presentá boso kurpanan como sakrifisio bibu i santu aseptabel pa Dios, kual ta boso sirbishi spiritual di adorashon.**

Sòru pa kontrolá bo kurpa. E ta un bon sirbidó pero un mal maestro. Si bo permití su nesesidatnan físiiko regla bo bida, lo bo tin problema. Bo por asta bira un esklabo di kustumbernan ku lo destruí bo salú i ku ta lagabo hasi kosnan pekaminoso ku ta malu i ku ta laga Dios rabia. Ora bo negliahá e nesesidatnan spiritual di bo naturalesa spiritual i biba solamente pa satisfasé deseongan di bo kurpa, bo ta bira mas i mas menos manera Dios.

**Piká a Destruí Bo Naturalesa**

Piká a mancha e imágén di Dios den bo. Hende ta bira mas malu ora nan ta purba di regla nan mes bida i ignorá Dios su propósito pa nan.

**Galatonan 5:19-21. Awor e obranan di karni ta evidente, kuanan ta : inmoralidat, impuresa, sensualidat, idolatria, bruheria, hostilidat, bringamentu, pleitamentu, desakuerdo, doktrina falsu, envidia, buracheria, parandiamentu, i kosnan asin'áki , di kuanan mi a spierta boso kaba di antemano, ku esnan ku praktiká sorto di kosnan asina lo no eredá e Reino di Dios.**

**Bo No por Agradá Dios ku bo Propio Esfuersonan**

Dios tin un bon propósito pa bo. Pero a menos ku E yudabo, lo bo no ta apto pa sigui'e. Ni maske kuantu bo purba, nunka lo bo no ta suficiente fuerte pa hasi loke ta agradá Dios tur ora. E lo mester kambia bo.

**Romanonan 7:18-20. Pasobra mi sa ku no tin nada bon ta biba den mi ---- esta den mi**



karni;pasobra e deseó ta presente den mi, ma e hasimentu di bon sí no téi. Pasobra e bon ku mi ta deseá di hasi, mi no ta hasi; ma mi ta praktiká eksaktamente e maldat ku mi no ta deseá di hasi, ....sino ta e piká ku ta biba den mi.

**Bo Ta Asina NO Manera Dios Ku Bo Mester Wordu Renobá i Kambiá Di Paden**

Bo no por kambia bo mes dor di djòin un iglesia òf di purba ta bon. Ta mester di Dios pa yudabo. Si bo permiti'E, E lo manda su Spiritu Santu pa restourá Su naturalesa den bo. Ta asina so lo bo ta kapas pa agrad'E.

**Pa Bo Hasi**

*Lesa e sekshon aki atrobe miéntras bo ta buska maneranan den kua bo NO ta manera Dios. Pone un strepi bou di kualke kos ku bo NO ke den bo bida.*

- Nos kurpa ta un ..... maraviosos di Dios.
- Nos a bira mas i mas menos manera Dios si nos laga nos..... goberná riba nos.
- Bo por agradá Dios dor di bo mes esfuersonan? .....

**DI 4 PARTI**

**KI TIPO DI HENDE BO KE TA?**



Un pida klei por ta òf un klòmpi mahos òf un piesa di porselana fini. E loke ku ta sali ta depende di e deseongan di e doño i e abilidat di e alfarero.

Si naturalesa humano kue su mes kaminda e ta bai di malu pa pió. E ta bira un plas di pensamentun sushi yen di rabia i aktonan malu. Sinembargo, den e mannan di Dios, e Alfalero Maestro, bo bida por bira ehèmpel di un bunitesa inkreibel i di bon uzo.

**Romanonan 12:2 No sea konforme e mundu aki, ma sea transformá pa medio di e renobamentu di boso mente, pa boso por komprobá kiko ta e bon i agradabel i perfekto boluntat di Dios.**

### **Pa Bo Hasi**

- Bo ke pa Dios renobá bo i kambia bo di paden?  
..... Ku bo mes palabranan , puntr'E pa hasi'e.
- Si bo ta un kristian kaba, kisas bo ke kita for di loke bo sa ku no ta agrad'E i bira mas manera Dios. Si ta asina, kont'E anto di nan i pidi'E yudansa.

### **DI 5 PARTI**

## **KON BO POR SA KU BO TA UN YU DI DIOS?**

For di ora bo aseptá Kristu Hesus komo bo Salvador, Dios ta aseptá bo como Su yu. E ta hasi bo konsiente di esaki na tres manera:

- Dor di Su palabra ku ta bisa asina
- Dor di e siguransa interno di e testimonio di Spiritu Santu
- Dor di e kambio den bo bida



**1 Huan 5:10-12. Esun ku kere den e Yu di  
Dios tin e testimonio den su mes....Ku  
Dios a duna nos bida etérno, i e bida aki  
ta den Su Yu. Esun ku tin e Yu tin e bida.**

**Romanonan 8:16. E Spiritu mes ta duna  
testimonio huntu ku nos spiritu ku nos ta  
yu di Dios.**

**1 Huan 3:14. Nos sa ku nos a pasa di  
morto pa bida, pasobra nos ta stima nos  
rumannan.**

### **Pa Bo Hasi**

- Bo a aseptá Hesus komo bo Salvador?  
.....
- Bo sa ku bo ta un yu di Dios?  
.....
- Kere loke e Palabra di Dios ta bisa tokante  
di eseis i gradisi'E awor ku Ela hasi bo Su  
yu.

### **Pabien ku bo a kompletá Lès 3.**

*Kontestá e preguntanan di Lès 3 den e  
Resúmen di Lès di preguntanan na final  
di e buki. Despues sigui ku estudio  
di Lès 4.*

*Dios bendishonábo rikamente!*